

Pablo Jesúsgin-kwenamalah-  
Filiposgin-pukmaladga Karta  
Palmijad  
Filipenses

Imi Pablo kepegin neg-kwebur-Filiposgin Pab-kaka-nuegangin chunmadi-kus. Tenal teun tulemal oturdaleged-neggin Pablo tegin Silas-odosmal (Hechos 16.) Imi Filipos Romano-neg-kwebur-totogwadga chii. Tenal Filipos Europa-togedgin chimo. Al tulemal Filiposzhe irmanonidamal ichejul-immalmal ukegal. Tenal tulemal-tetual-ampagusmalad Filiposzhek ol-egwasmal.

Imi Pablo Romagin oturdaleged-neggin-mellejiidgin kwenadgan-Filiposgin-pukmalad Pablo-pilaledbal machi-Epafroditos-palmismal Pablo-pentagal, tegin Pabloga mani palmismalbal. Al Pablo yer-itogedgin kwenadgan-Filiposgin-pukmaladga Pab-Purpa-Nuedbal karta nermas tog-nuedi choggal. Pitomalgu.

<sup>1</sup> Imi antin-Pablo tegin Timoteo anmal-walbobogwad Jesucristoga-arpamalah. Imi anmal pemal-Filiposgin-pukmalad-Jesucristogin-akenanimaladga, tegin tule-Jesúsgin-penzhulmalad-iktumalah, tegin tule-Jesúsgin-penzhulmalad-pentamalah karta wis palmijimalmo.

<sup>2</sup> Imi Pab-Tummad-anmal-pab, tegin Pab-Jesucristo pemalga immal-nuegan-imakelen, nabirin, tegin ulubgin akalzhul-itogal pemal-imakelen, nabirbalin.

*Pablo Filipos-tolganga Pabzhe kochad*

<sup>3</sup> Imi an pemal-ebinzhealil, an keg-chulgu Pabga tog-nuedi chogalda. <sup>4-5</sup> Imi pemal kepe-akar imisgwadzhe ampa anpak mes alamadi-kusmal an Pab-Jesús-kaka-nuegangin chunmagal. Al an Pabzhe kolalil, an welig-waledgin pemalga Pabzhe kolalda.

<sup>6</sup> Imi an Pab-kwen-penzhuldo, Pab Tummad kepe-akar imisgwadzhe pinna-pinna pe-ogwamai. Tegin Pab ampa ukin-nadgu pinna-pinna pe-ogwanatapbalo Jesucristo itina-pche kannan tanikoedzhe, pe pellallé ogwaledgzhe.

<sup>7</sup> Al an naga ulubgin pemal-pilaledbal antin, an takto an pemalgin immal-chogzhaddin, ib-nued. ¿Ibiga an teob chog? Nabir. Imi an meke oturdaleged-neggin mellejiil, o an meke Pab-Jesús-kaka-nuegan-irwal kwisguel, o meke an chogzhabalil Pab-Jesús-kaka-nuegan ib-chunchunnad, pemaldin ampa an-pakamalad. Tenal Pab wilejakwa pemal-taked-wilubzhulinadbal Pabdin yabli wilejakwa pemal-taknonimalmo. <sup>8</sup> Tenal Pab Tummad an-nued-wisdo, an peydzhe pemal-takpi-kudii, Jesucristo-pemal-pilal-kujadyobmo.

<sup>9</sup> Al an pemalga Pabzhe kolalil, an Pabzhe ekisalda, pemal Pab-Jesús-igal-wijiidbal tegin pe yer nono-nikadbal pemal pul-pule aga pilalgumalalen, nabirin.

<sup>10</sup> Tenal an pemalga Pabzhe ekisnaibal pemal mag ito-malgal piti-igal pul-napírra, pemal chwilidik nanegal. Al Cristo itina-pche kannan tanikil, pemalga immal-choged kwen nikchul-kuo. <sup>11</sup> Al pemal Pab-Jesucristo-igalbal nued timalal, pemal kep Pab-kannaleged-oyomalo. Tegin Pab pemalbal pul-tule-tummadyob taklego, tegin Pab pemalbal peydzhe otummolenonibalo.

*Pablo oturdalemaidgin Pab-kaka-nuegan chognaid*

<sup>12</sup> Jesúsgin-kwenamalad, imi an pemalga wisgal chogdo, anka-immal-kujad anka ib-nuedga kus. Imi

pemal ebinzhemal, an oturdalemaidbal Pab-kaka-nuegande pal kwen mimilegojul. Chulá. Imi Pab-kaka-nuegan pul-pule mimilego. <sup>13</sup> Imi chulubmal-Romanotummad-César-neg-takmaladgin-pukmalad an-wismal, tegin tule-pimalad-pel-kwapa an-wismalmo, antin Pab-Jesúsbal-naid-ulgin oturdalemai.

<sup>14</sup> Imi Jesúsgin-kwenamalad oturdalemai an-itosmalgu, pel-kwablejal pul-pule Pab-Jesúsgin-penzhulidgin kan-nalesmal, tobzhulidgin Pab-kaka-nuegangin chunmagal-mal.

<sup>15</sup> Tenal an wisdo, tule-wal-walgwen an-pentagal Pab-Jesús-igalgin kwen chunmananijulmal. Tenal we kwenamalad istar an-takmaladbal tegin anka-pul-tule-tummadga-kubiedbal Pab-Jesús-igalgin chunmananimal-bal.

Tenal kwenadgan-pimaladdin yer an-takedbal Pab-Jesús-igalgin chunmananimal. <sup>16</sup> Tegin kwenamalad-nabiridbal-chunmananimaladdin wismaldo, Pab an-amis, itigin oturdalemaidgin e-kaka-nuegan-irwal chunmagal. Al we kwenamalad an-pilaledgin Pab-Jesús-kaka-nuegangin chunmananimal.

<sup>17</sup> Tenal kwenamalad-istar-an-takmaladdin aga tukin tule-tummadga-kubiedbal Jesús-igal-nueganbal chunmananimal. Tenal we kwenamalad napírragwadgin kwen chunmananijulmal, pinche ib-chunnadyob chunmananimal. Tenal we kwenamalad ebinzhemal, emalde Jesúsbal-chunmanaidgin, an-oturdalemaidgin anka pul-kigma wileged onomalo.

<sup>18</sup> ¿Imisgin igi an chao? ¿An urwo o an urwojul? Ankadin ampa iwen-kwen-akalzhu, tulemal meke askin pinche chunmananimal, o nabiridbal chunmananimal, ankadin ampa yopí. Tenal ankadin pul-chunchoged Pab-

Jesús-kaka-nuegan pul-pule mimile. Tenal Pab-Jesús-kaka-nuegan-mimilemaidbal an welido.

*Pablo aga mag itojad, ega kujal igi kuoed*

<sup>19</sup> Imi an nued wisdo, pemal anka Pabzhe koledbal, tegin Pab-Jesús-Purpa-Nued an-pentakedbal, ankin immalkunaid pelgunoniko. Al an pela-pela welgujui.

<sup>20</sup> Tenal an chogde, an naga penzhulidyob, tegin an peydzhe peigujidyob an kwen pinkeguojul; tenal an akpene unnigujadyob an imisgin tobzhulidgin unigubalo. Al an meke tullego, o an meke purko, Cristo anpal otummoledi-kuo. <sup>21</sup> Tenal an tula-tiil, Jesucristoga tula-tio. Tenal an purkwijal, anka pul ib-nuedga kunoniko, an Pab-Jesúsbak mes megnegal. <sup>22</sup> Tenal an tuladibalil, an pul untar Pab-Jesúsga arpago. Al an wichulzhundo, an-chogbo-chogzhiid, piti pul an chuo.

<sup>23</sup> An purkwijal, anka pul-ib-nued, an Pab-Jesúsbak mes megnegal. <sup>24</sup> Tenal an tula-kudibalil, pemalga pul ib-nuedga kunoniko. <sup>25</sup> Al antin naga mag itodo, an pemalbak yabli peine, pemal pul Pab-Jesús-igal wisgugal, tegin pemal pul-pule yer itomalgalbal. <sup>26</sup> Tenal an ampa tula-tiil, an pemalzhe kannan natapil, pemal an-tuladbal Pab-Jesucristogin welgumalo.

<sup>27</sup> Al anka meke-igi kunonikil, pemalgin chii Cristo-igal-nuegan-mamikidbal nued nanemalgal. Al an pemalbak mail, o maichulil, an pemal-itogalil, pemal pulakwa pinzheed-choggwénnagwadgin nanebukmal, tegin pemal tulemalga pulakwa kaka-choggwénnagwadgin Jesús-igal-nueganbal chunmananimalbal.

<sup>28</sup> Tenal pemal tobzhul tule-istar-pe-takmaladga chunmananimaladbal tule-istar-pe-takmalad mag taknonimalo, emalde pelgunonimalo, tenal pemal Pab Tummadbal abonolenonimalo.

<sup>29</sup> Tenal Pab Tummad pemalga igal-kwen-ukchajul. Pab-Jesúsiginbi ibzhegalbi, tenal pemal Pab-Jesús-nuggin wilegalbal.

<sup>30</sup> Imi antin pemal-yopí wileged-abalgin alamanaimo. Tenal pemal akpene igi an-takchádin an wilemai, imi an ampala wilemai.

## 2

*Jesúsigin-ibzhemalad Jesucristo-pinzheedyob aga emal-emal pinzhemalod*

<sup>1</sup> Imi pemal Pab-Jesúsbak-mes-tiidbal okannolediil, tegin pemal Pab-Jesús-pilaledbal yer-itodiil, tegin pemal Pab Purpa Nuedbak tiil, tegin pemal ankin-pinzheedgin wilejakwa an-taktiil, <sup>2</sup> pemal pela-pela weligwal an-imako. Al pemal aga pulakwa naneenabmal, tegin pemal aga emal-emal yopí pilalguenabmal, tegin pemal aga choggwénnagwadgin yopí pinzheenabmalbal.

<sup>3</sup> Tenal pe melle tule-tummadga-togbiedyob immal imako, tegin pe melle tummarba-itogedgin immal imamalbal. Tenal pemal melle tule-tummaganyob nane-malo, tenal pemal aga emal-emal tule-tummaganyob tak-malo. <sup>4</sup> Imi pemal melle aga tukinbi pinzhemalo, tenal pe tule-pimaladgin ampa pinzheenabmalmo.

<sup>5</sup> Tenal pemal Pab-Jesús-pinzheedyob pinzheenabmal.

<sup>6</sup> Imi Jesucristo Pab-chunchunnaddindo, tenal Jesucristo kwen pinzhaszhul-kus, Pab-Tummad-yopí tummadga nanegal.

<sup>7</sup> Tenal Jesús iti-napche tuleyob mimmilenonigu, tule-pinchegadga aga imas, tegin tule-mosyob kudigusbal.

<sup>8</sup> Tenal Jesús iti-napkin tuleyob tigusgu, tule-tummadzhulidyob aga imas, tenal Jesús aga e-Pab-pallí ibzhedi-kusbal

e nakrusgin purkwijadzhe.

<sup>9</sup> Al Pab Tummad pul-tule-tummadga Jesús-odos.

Tegin Pab Tummad Jesúsga,

egmal-tulemalga pul nug-tummad ukchabal.

<sup>10</sup> Te-ulgin tule-nikpa-negginmalad,

tegin tule-iti-napkinmalad,

tegin tule-napil-ulpal-mamimalad Jesús-takalmalal,

Jesús egmalga-pul-tule-tummadiidbal

Jesúsga chintinonimalo,

<sup>11</sup> tegin we tule-chogpágwad-pel-kwapa

aga tukin chogdamalo:

“Pedin-Jesucristo, Pul-Tule-Tummad.”

Al tulemal-Jesúsigin-chognonimaloedbal,

Pab-Tummad-nug pela-pela otummolenoniko.

*Jesúsigin-kwenamalad oyonaid Pab-igaldin igi mai*

<sup>12</sup> An-aimal, an-pemal-pilalmalad, imi an pemalbak maigusgu, pemal an-choged-pallí nanedi-kusmal. Imi an pemalbak tikajulgu maichulidgin pemal pul-pule an-choged-pallí nanedimalbal. Al pemal Pab-tobedgin, tegin Pabgin-atagedgin tegin pe abonolejadgin pe nuekwa tak-enabmal pe nued nanebukmal-dewa.

<sup>13</sup> Tenal Pab pemal-ulubgin e-itolegedbal arpanaidbal, pemal Pab-choged-pallí nanebi-kudamalo.

<sup>14</sup> Tenal pe melle chochoedgin immal imako, tegin pe melle tulebak abin-abinidgin immal imabalo,

<sup>15</sup> pe tule-napírragwadga kugal, tegin tulemal melle pemalgin ib-choged nikugal. Al pemal tule-iskana-abalgin, tegin tule-immal-akalosmalad-abalgin, pe Pab-nuskanyob immal-akalozhulidgin kudigumalo. Tenal an-pemalga-chogzhadyob pe nanedimalal, iskwa neg-chichidgin kaedyob pe neg otalomalo.

<sup>16</sup> Tegin pemal Pab-Jesús-kaka-nuegangin tulemalga chunmananimalo, igi nabir purpal tullemallo. Al Cristo itina-  
napche kannan tanikil, antin, an yer-itogedgin pemalgin  
chogo: “An pinche kwen nanedi-kuszhul, tegin an pinche  
kwen arpaszhulbal.”

<sup>17</sup> Tenal pemal Pabgin kwen penzhulmal, tegin pe-  
mal Pabga arpamalbal Pabga-immal-ukedyob. Tenal  
an purkwenonikil, antin Pab-Tummadga-immal-ukchad-  
askin napi-nis eyonaidyob kunoniko. Al antin yer-  
itononiko, tegin an pemalbak mes welgunonimogo. <sup>18</sup> Al  
pemal yer-itogenabmal, tegin pe anpak mes welgunoni-  
malmogo.

*Pablo Filiposzhe Timoteo-palmineed*

<sup>19</sup> Imi Pab anka igal-ukchal, an imichal pemalzhe  
Timoteo-palminatapo. Tenal an pemal-wisgual pemal  
nuekwa Pab-Jesúsbak nanebukmal, an yer itononiko.

<sup>20</sup> Tenal antin tule-pid-pal-nikchul pemal-pentagal.  
Tenal Timoteobi napírra pemal-pentabi-kunaimo.

<sup>21</sup> Tenal tule-pimaladdin aga tukinbi pinzhemal, Pab-  
Jesucristo-tulemal-pentabiedyob kwen pinzhejulmal.

<sup>22</sup> Tenal pemal pato wismaldo, Timoteo igi nane.  
Imi Timoteo peyedzhe Pab-kaka-nuegan-chogedgin an-  
pentadi-kus, an-machi-chunchunnadyob.

<sup>23</sup> Imi an nuekwa wisgual anka igi kunoniko, kep an  
pemalzhe Timoteo-palminejun. <sup>24</sup> Tenal an penzhuldo, an  
imichal Pab-chogedbal pemalzhe natapmogo.

*Pablo kannan Epafrodito-palmijogalid*

<sup>25</sup> Imi an takto, an pemalzhe pul-nabir kannan kwenad-  
Epafrodito-palmio. Imi we machi an-pakad, tegin anpak-  
mes-arpagedbal. Tenal we machi anpak mes alamasbal  
Pab-Jesús-kaka-nuegan palchoggal. Tenal pemal nugu-  
pinzheedbal anka Epafrodito-palmismal an-pentagal.

<sup>26</sup> Imi Epafrodito peyedzhe pemal-takpi-kudii. Tenal pemal e-wisgusmaladbal ede yegus, al Epafrodito peyedzhe pukib-itononibal.

<sup>27</sup> Imi pemal nabir wisgusmaldo, Epafrodito peyedzhe-pakal yegus, iche-napi purkwenen. Tenal Pabdin wilejakwa-Epafrodito-takchadbal kannan Epafrodito-okwichisbal. Tenal Pab wilejakwa Epafroditoginbi pinzhaszhul, tenal Pab ampa wilejakwa an-takchamo, an melle twagdar peyedzhe pukib-itogal. <sup>28</sup> Al an pemalzhe kueye-kueye Epafrodito-palmine pemal Epafrodito-takalmalal, pemal weligwal itomalgal, tegin an melle pukib-pal-itogalmo.

<sup>29</sup> Tenal pemal Jesúsgin aga kalgwenadyob ampokaal weligwaledgin Epafrodito-abingemalo. Tenal pemal tule-Epafroditoyobmalad pe otummoenabmalbal. <sup>30</sup> Imi Epafrodito Pab-Jesúsga arpanaid-ulgin, iche-napi purkwenen pemal-anal aga tukin igal-puledgin togzha an-pentagal.

### 3

#### *Kwenadgan Jesúsgin penzhulmalad*

<sup>1</sup> Nabirdo, Jesúsgin-kwenamalad. Imi pemal, pe Pab-Jesúsgin welgumalo. Imi an teun akpene pemalga chogzhadyob an kannan pemalga chogbal. Tenal ankadin ampa iwen-kwen-akalzhul an kannan pemalga choggal pemalga pul ib-nuedga kunonigal.

<sup>2</sup> Tenal pemal wijirmal, tule-iskana-igal-pid-nikmaladzhe. Imi we tulemal tule-iskanamal. Tenal we tulemal kalagwenzhul aga abgan-tuku chiknanimal Pabbak naigugal.



<sup>3</sup> Tenal Pab-igal-napírragwad we tulemal-chogedyob kwen chogzhul. Tenal we tulemal pinche aga abgan-tukuchikedgin yer itomal, tenal anmaldin sanal naga immal-imakedgin kwen ibzhejulmal. Imi anmal chunchunnad Pabgaddo.

Al Jesús anmalga purkwijad-ulgin, anmal yer itomal. Tenal anmal Pab Purpa Nuedbal Pabzhe-koledgin Pabotummonanimalbal. <sup>4</sup> Imi an we tulemalyob sanal nanebielen, an tule-chunnadbal an akalzhul we tulemalyob nanemogoen.

Imi an tule-igalzhiktin an tule-abgan-tukuchikalmaladga pul tule-chunnadga mai. <sup>5</sup> Imi antin, an-mimmilejad-ibapábakkin abgan-tuku-chikles. Tenal antin Israel-tule-chunnad. Tegin an-igalbal Benjamín-e-wagwa. Tegin an tule-chunnadbal. Tegin an Pariseoga kudigusbal Moisés-igal-mamikidbal inniki nanegal. <sup>6</sup> Tenal an pela-pela chabzhul tule-Pab-Jesúsbananimalad-imas, tule-Pabbal-nanimalad melle Moisés-igal igemalgal. Imi an Moisés-igal-mamikidbal inniki nandedidbal, tulemal ankin choged kwen nikchulmal an noal nandedii.

<sup>7</sup> Imi an akpene yer Moisés-igalmal taktiin. Imi an Pab-Jesúsbal-naigunonikidbal, Moisés-igal anka ib-kegkuedga kunonijun.

<sup>8</sup> Teginbal, an takto an-akpene-pel-kwapa-yer-immal-itodi-kujad, anka ib-kegkuedga kunoni. Tenal an Tummad-Jesucristo-wisgunonikidbal anka ibi-nuedga kunoni. Tenal an Jesucristobal-naigujadbal immalmal péI periengunonibal. Al an akpenegwad-igalmal an turwayob taknonijun, an-akpenegwad-igal-igejadbal an nuekwa Cristobal naigunonigal.

<sup>9</sup> Imi an peido Pab-Jesús an-taktanikoedgin an ampa Pab-Jesúsbal kudii, Pab Tummad tule-iskued-

nikchulidyob an-taknonigal. ¿Ibiga Pab iskued-nikchulidyob an-taknoniko pe ebinzhe? ¿An Moisés-igalgin immal-akaloszhuolidgin nanajadbal? Chulá. Tenal an-Jesucristogin-penzhulidbal Pab Tummad tule-iskued-nikchulidyob an-taknoniko.

<sup>10</sup> Tenal antin pul-pule Jesucristo-wisgubi. Tenal Jesucristo e-kannalegedbal kannan tullejad an itobimo. Tenal Cristo-wilejadyob an wilebimo, an Jesús-purkwijadyob purkwedzhemo. <sup>11</sup> Al an purkwijal, an kujal meke-igi purkwaled-akar an kannan tullegenabbal.

*Jesúsigin-penzhulmalad Pab-Jesucristo-igalgin alamananimel-pel-kwapa turdagal*

<sup>12</sup> Imi antin keg chogel, an Pab-Jesucristo-igal pato pelos an ib-nueganbi ima. Tenal antin ampa napido. Al antin, an pane-pane alamanai Jesucristo-peigujiidyob nanegal. Imi akpene Jesucristo an-amis, e-choged-pallí nanegal.

<sup>13</sup> Jesúsigin-kwenamamad, imi an naga tukin takmodo, an Pab-peigujiidyob ampa an kwen omojul. Tenal an akpene immal-imajadgin an pal kwen pinzhejul. Imidin an alamanaichundo Pab-peigujiidyob nanegal, <sup>14</sup> tule abarmanaidgin aga pengunaidyob, toa inzhel aga omomalo. Imi an omojal, an-Jesucristobak-nued-kudiidbal Pab-neggin anka immal-nuegan uklego.

<sup>15</sup> Tenal pemal-Jesucristogin-pinzheed-nikumamimalad ampa an-yopí pinzheenabmalmo.

Tenal pemal-wal-walgwen an-chogzhadyob ampa kwen pinzhejulil, Pabdin wisgugal pe-imako, anyob pinzhegal. <sup>16</sup> Tenal pemal piaje Pab-Jesús-igalgin turtásdin, pe teje naneenabmalmo.

<sup>17</sup> Kwenamalad, imi pemal an-taedyob pe taenab-malmo. Imi an pemal-waglik megwisgu, an nanedi-kujadyob, pe tulemal-takalil, pe we tulemal-pallí pe tamalmogo.

<sup>18</sup> Tenal an akpene pemalga melugus chogzhagus, tenal an kannan pemalga chogbal, tenal poed-abalgin: imi tulemal-ichejul istar timal; tenal we tulemal Jesucristo-nakrusgin-purkwijad-igalbak aichulmal. <sup>19</sup> Tenal Pabdin kujal sapejul we tulemal-oturdononiko.

Tenal tulemal-Cristobak-aichulmalad mas-kunnedginbi pinzhedimal, Pab-immalmalgin kwen pinzhejulmal. Tenal we tulemal e-istar-tiidgin aga pinkegued-wiluban, tenal imidin we tulemal pul yer e-istar-tiid takmal. Tenal we tule-iskana iti-napkined-igalginbi pinzhemal.

<sup>20</sup> Tenal anmaldin iti-napkined-igalgin kwen pinzhejulmal. Tenal anmal Pab-neggin-megmaloedgin pinzhenanim. Tegin anmal tule-Pab-neg-akar-tule-abonoed-tanikoed-abintabukmal. Tenal tule-anmal-abonoeddin anmal-Tummad-Jesucristo.

<sup>21</sup> Tenal Pab-Jesucristo e-kannalegedgin pel-kwapa immalmal-kani chii. Tenal Pab-Jesucristo ampa we kannalegedbal eyobidzhe anmal-chan-pole ogwago, e-chan-keg-pelguedzhemo.

## 4

### *Kwenadgan Pabgin pane-pane welguenabmal*

<sup>1</sup> Kwenamalad, an pemal-pilalmal, tegin an pemal-takpimalbal. Tegin an pemalgin welgujui, tenal antin, an-olo-kurkinyob pemal-takmalbal. Tenal an pemalga Pab-Jesús-igalgin chunmadi-kujadyob, pemal kantik Pab-Jesúsbak nanemalo.

<sup>2</sup> Imi antin omegan-walbogidzhe wilenai, Evodia tegin Sintiqueje. Imi pemal Jesucristobak-nanimaladbal aga igal-nudamalo. <sup>3</sup> Tegin an-ai-nued-anpak-arpagedga an chogmo; imi pedin we omegan-walbogwad-wis-pentako aga yopí pinzhemalgal. Tenal we omegan anpak tegin Clementebak tegin tule-pimaladbak mes alasmal Pab-Jesús-igalgin chunmagal. Tenal tulemal-anpak-mes-arpadi-kusmalad Pab-neggin pato nug nermakal mai ilagwen meggal.

<sup>4</sup> Tenal pemal pane-pane Jesucristogin welgumalo. Tegin an kannan pemalga chogbal, pe welgumalo.

<sup>5</sup> Tenal tulemal mag pe-takemalgal, pe tulemalbak pinallé nanemalo. Tenal Pab-Jesucristo-kannan-tanikoed pato omodani.

<sup>6</sup> Tenal pemal melle nue chuli-pinzhe itomalo. Tenal pemal Pabzhe-koledgin, pe Pabga pél immal chogenabmal, tegin pe Pabzhe pél immal ekisenabmalbal. Tegin pemal Pabga tog-nuedi chogenabmalbal. <sup>7</sup> Tenal anchogzhadyob pe Pabzhe immal ekismalal, Pabdin tuleaku-itogedzhe Jesucristobal pe-ulubzhe, pe-pinzheedzhe, pemalga akalzhul-itogal pe-imako.

<sup>8</sup> Kwenamalad, imi an pemalga napi chogdo: pemal igal-nueganginbi pe pinzhemalo; pe igal-chunchunnadginbi pe pinzhemalo, tegin pe tulegin-ataged-igalginbi pe pinzhemalo, pe igal-napíragwadginbi pe pinzhemalo, pe igal-ilagwenadginbi pe pinzhemalo, tegin pe igal-yer-tule-imakedginbi pe pinzhemalo, tegin tule-igal-yer-chunmamaladginbi pe pinzhemalo, tenal meke-ibi-igal-nued otummoledi-kugal, we igalmalginbi pe pinzheenabmalbal.

<sup>9</sup> Tenal pemal ankin turdajad-yopí, tegin pemal an-takchad-yopí nanedii, tegin pemal an-itojad-yopí, pemal ampa pane-pane naneenabmalmo.

Tenal pemal an-chogzhadyob naneel, Pab-ulubgin-akalz hul-itogal-tule-imaked, pemalbak mes tio.

*Pablo ega-mani-uklejadal tule-Jesús gin-penz hulmaladga tog-nuedi chogzhad*

<sup>10</sup> Tenal pemal tikajulgus an-kwen-pentasz hulmal. Imi pemal kep kannan an wis pentanonimalbal. Al antin Pab-Jesús ga tog-nuedi chognoni. Tenal an pemalgin keg chogel, pemal an-igesmal. Tenal an wisdo, pemal an-pentabien, tenal pemal keg kugusmal. <sup>11</sup> Imi an pemalga chogzhiid, pe melle pinzhemalo an pemalzhe immal ekichi. Tenal anka immal-kwen-akalz hul an igi mai, tenal antin pato turdas meke-igi meggal.

<sup>12</sup> Tenal antin pato turdasbal, nued meggal, tegin pollé meggalbal, anka iwen kwen akalzhul. Imi an imme tiil, o an ukul mesdiil, ampa anka iwen kwen akalzhul, ankadin pé l nabiritkibi. Imi anka immal unnil, o ampa anka immal akuel, anka ampa nabir. <sup>13</sup> Tenal Pab-Jesús an-okannoedbal pel-kwapa an unnio.

<sup>14</sup> Tenal an-wilenaidgin pemal yabli anka ib-nued imas-mal, tegin an-pentasmalbal.

<sup>15</sup> Filipos-tolgan, tenal pemal an-nued-wismal, an Macedonia-akar nadgu, an Pab-Jesús-kaka-nuegan pal-choggal an nad. Tenal teun-akar imisgwadzhe, iglesia-pimalad anka mani kwen ukchajulmal, pemal-Filipos-tolganbi anka mani wis ukchamal. <sup>16</sup> Tenal an Tesalónica-Macedoniagin ampa maidgin, pemal pato melugus anka mani palmis, an melle immal chulgugal.

<sup>17</sup> Tenal an pemalgin mani-kaedgin kwen pinzhejul. Tenal antin, an pei, pemal Pab-neggin pul-ichejul immal-mal nikugal.

<sup>18</sup> Tenal pemal anka Epafroditobal immal palmialidbal, an unnigualdzhe immal-mal nika, tenal immal-mal yabli

ankin okpin. Tenal pemal anka mani-palmialmalad, Pab yer takcha, tule-kugedgin-ega-immal-ukchadyob wawadik-yapan itos. <sup>19</sup> Imi pemalga immal akualmalal, an-Pab-Tummad pela-pela Jesucristo-immalmal-nikadbal, pemalga péI pe-immal-napigujimalad uko.

<sup>20</sup> Imi anmal-Pab-Tummad-anmal-pab ilagwen-nadgu otummoledi-kuelen, nabirin. Teobdo.

<sup>21</sup> Tegin pe Jesucristogin-akenanimaladga pe chogo, antin nued mai. Tegin Jesúsgin-kwenamalad-anpak-pukmalad pemalga chogmalmo, emalde nued pukwamalmo.

<sup>22</sup> Tegin Jesúsgin-akenanimalad-pukmalad pemalga pel-kwapa chogmalmo, emalde nued pukwamalmo; tegin Jesúsgin-kwenamalad-Romano-Tummad-César-neggin-pukmalad ampamo.

<sup>23</sup> Imi Pab-Jesucristo pel-kwapa pe-purpaga immal-nuegan imakelen, nabirin. Pitomalgu.

**Pab tummad karta pab Jesucristobal igal-pin mezhijad**  
**New Testament in Kuna, Border (PM:kvn:Kuna, Border)**

copyright © 2009 Wycliffe Bible Translators, Inc.

Language: Kuna, Border

Translation by: Wycliffe Bible Translators, Inc.

Kuna, Border [kvn], Panama

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kuna, Border

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

